

Ni Pangulong  
Henry B. Eyring

Unang Manuglaygay sa  
Unang Panguluhan



# Gintawag sang Dios kag Gintib-on sang mga Tawo

**B**ilang mga miyembro sang Simbahan, masami kita ginaagda sa pagtib-on sang mga tawo sa palangakuan agud mag-alagad. Mga tinuig ang nagligad, isa ka 18-anyos nga estudyante ang nagpakita sa akon kon ano ang kahulugan sang pagtib-on sang mga alagad sang Ginuo. Ako sa gihapon ginabugayan tungod sa iya mapainubuson nga ehemplo.

Bag-o gid lang sia nagsugod sa iya una nga tuig sa kolehiyo. Wala pa isa ka tuig nga sia mabunyagan sang sia magbiya sa [ila] puluy-an agud sugdan ang iya pag-eskwela sa isa ka dako nga unibersidad. Didto nag-alagad ako bilang iya bishop.

Sa pagsugod sang klase sina nga tuig, makadali ko sia nga gin-interbyu sa opisina sang bishop. Diutay lang ang akon madumduman sadtong una nga pagsugilanon luwas lang nga sia naghambal parte sa iya mga hangkat sa isa ka bag-o nga lugar, apang indi ko gid malimtan ang amon ika-duha nga pagsugilanon.

Nagpangabay sia nga makigkita sa akon sa akon opisina. Nasorpresa ako sang sia magsiling, "Mahimo bala kita magpangamuyo, kag pwede ako lang ang mangamuyo?" Daw mahambal na gid ako nga nakapangamuyo na ako kag nagapaabot ako nga sia nakapangamuyo naman. Sa baylo nagpasugot ako.

Ginsugdan niya ang iya pangamuyo paagi sa isa ka panaksihon nga nakahibalo sia nga ang bishop gintawag sang Dios. Ginpangabay niya ang Dios nga

hambalan ako kon ano ang iya dapat himuong sa isa ka bagay nga may dako nga espiritwal nga konsikwensya. Ginhambalan sang pamatan-on ang Dios nga naka-seguro sia nga ang bishop nakahibalo na sang iya mga panginahanglan kag mahatagan sia sang laygay nga iya kinahanglan mabatian.

Samtang nagahambal sia, ang pat-od nga mga peligro nga iya atubangon nag-abot sa akon panghunahuna. Simple lang ang laygay apang ginhatac sing klaro gid kaayo: magpangamuyo pirme, magtuman sang mga kasuguan, kag indi magkahadlok.

Inang pamatan-on, nga isa ka tuig sa Simbahan, nagtudlo paagi sa ehemplo kon ano ang sarang mahimo sang Dios sa isa ka lider samtang sia ginatib-on sang pagtuo kag pangamuyo sang mga tawo nga sia gintawag sa paggiya. Inang pamatan-on nagpahamtang para sa akon sang gahum sang layi sang pangkabilugan nga pag-uyon (common consent) sa Simbahan (tan-awa sa D&C 26:2). Bisan pa nga ang Ginuo nagatawag sang ya mga alagad paagi sa bugna, sila sarang lamang makabuhat pagkatapos sila nga gintib-on sang mga tawo sa diin sila gintawag sa pag-alagad.

Nagahimo kita sang hanuot nga mga promisa paagi sa pagbayaw sang aton kamot. Nagapromisa kita nga magpangamuyo para sa mga alagad sang Ginuo kag nga Sia magagiya kag magapabaskog sa ila (tan-awa sa D&C 93:51). Nagapromisa kita nga aton pangitaon kag

paabuton nga mabatyagan ang inspirasyon gikan sa Dios sa ila laygay kag kon nagahikot sila sang ila mga palangakuan (calling) (tan-awa sa D&C 1:38).

Ina nga promisa kinahanglan nga pagbabag-uhon pirme sa aton mga tagipusuon. Ang imo titser sa Sunday School magatinghuha sa pagtudlo paagi sa Espiritu, apang pareho man sa imo, ang imo titser mahimo magsala sa atubang sang klase. Ikaw, ugaling, sarang makapamat-od sa pagpamati kag pagbantay sang mga higayon kon mabatyagan mo ang inspirasyon nga nagaabot. Sa ulihi mas diutay na lang nga sala ang imo madeparahan kag mangin mas madamo ang ebidensya nga ang Dios nagatib-ong sina nga titser.

Sa pagbayaw naton sang kamot agud itib-ong ang isa ka tawo, nagatug-an kita nga mag-obra para sa bisan ano nga katuyuan sang Ginuo nga inang tawo gintawag sa pagtuman. Sang magagmay pa ang amon mga kabataan, ang akon asawa gintawag sa pagtudlo sa magagmay nga mga kabataan sa amon ward. Wala lamang ako nagbayaw sang akon kamot sa pagtib-ong sa iya, kundi nagpangamuyo man ako para sa iya kag nagpangayo sang pahanugot sa pagbulig sa iya. Ang mga leksyon nga akon natun-an parte sa pag-apresyar sa ginahimo sang kababayin-an kag sang pagpalangga sang Ginuo sa mga kabataan padayon nga nagabugay sa akon pamilya kag sang akon kabuhi.

Nakigsugilanong ako sini gid lang sa sinang pamatan-on nga nagtib-ong sa iya bishop pila na ka tuig ang nagligad. Nahibaloan ko nga ang Ginuo kag ang mga tawo nagtib-ong sa iya sa iya tawag bilang isa ka misyонero, bilang isa ka stake president, kag bilang isa ka amay. Sang maghingapos ang amon pag-estoryahanay nagsiling sia, "Nagapangamuyo man ako gihapon para sa imo adlaw-adlaw."

Sarang kita magpamat-od sa pagpangamuyo adlaw-adlaw para sa isa ka tawo nga gintawag sang Dios sa pag-alagad sa aton. Pwede kita magpasalamat sa isa ka tawo nga nagpakamaayo sa aton paagi sa iya pag-alagad. Sarang kita magpamat-od sa pagpresentar [sang aton bulig] kon ang tawo nga aton gintib-ong nagapangayo sang mga manugboluntad.<sup>1</sup>

Sila nga nagasakdag sang mga alagad sang Ginuo sa Iya ginharian pagatib-ongon paagi sa Iya di-matupongan nga gahum. Kita tanan nagakinahanglan sina nga bugay.

## TANDA

1. Tan-awa sa *Teachings of Presidents of the Church: Joseph F. Smith* (1998), 211-12.

## PAGTUDLO GIKAN SA SINING MENSAHE

Pagkatapos nga mapaambit ang mensahe, binagbi-naga ang pagbasa sang masunod nga sinambit nga mga pulong: "Ang Ginuo magahimo sa imo nga isa ka instrumento sa lya mga kamot kon ikaw mapainubuson, mati-nuohon, kag maukod. . . . Magabaton ikaw sang dugang nga kusog kon ginatib-ong ikaw sang kongregasyon kag ginpain" (*Teaching, No Greater Call* [1999], 20). Tipuna ang panimalay sa palibot sang isa ka mabug-at nga bagay kag pangabaya ang isa katawo nga tilawan ini hakwat. Nga nagadugang sang isa katawo sa tagsa ka tion, ag-daha ang iban pa nga mga miyembro sang panimalay sa pagbulig hakwat sinang mabug-at nga bagay. Ham-bali kon ano ang matabo kon ang kada isa nagabulig. Binagbinaga ang pagdagmit sang laygay ni Pangulong Eyring parte sa praktikal nga mga paagi nga sarang naton matib-ong ang iban sa ila mga palangakuan.

## LAMHARON

### Salamat sa Akon Titser sa Sunday School

#### Ngalan wala ginapakilala

**A**ng akon klase sa Sunday School indi pirme malilong. Nanamian ako mamati sang mga leksyon sa tagsa ka semana, apang kon kaisa ang iban sa akon klase dawsa wala nanamian. Sa masami nagasinugilanong sila ukon nagahampang sang ila mga gadgets samtang ang amon titser nagatinghuha sa pagtudlo sa amon. Ang masubo, kon kaisa mamarasmasan ko nga upod man ako sa problema.

Isa ka semana nangin mas magahod pa gid kami sangsa nagliligad, kag sa katapusan sang klase, ang amon titser naghibi tungod wala sing may nagapamatni sa iya leksyon. Samtang nagapagwa kami sa kwarto, naluoy ako sa iya.

Sang pagkadason nga Domingo ang amon titser nagpaathag nga nagpangamuyo gid sia sing todo sina nga semana, nga nagapangayo sing paggiya, kag nabatyagan niya nga kinahanglan niya magpakita

sang isa ka sine [nga ginhimo] sang Simbahan. Ginpagwa niya ang sine nga parte sa kabuhi ni Jesucristo kag sa mga milagro nga lya ginhimo.

Samtang ginapamensar ko ang sine sina nga gab-i, may lain ako nga nabatyagan. Sa hinali akon narealisar nga nabatyagan ko ang Espiritu, labi pa sangsa akon nabatyagan sadto. Sa gilayon nagpamat-od ako nga

gusto ko maghimo sang mga pagbag-o sa akon kabuhi agud mangin kasubong sa Manluluwas, kag akon na-realizar nga ang [akon] naeksperiyensyan sa Sunday School sina nga adlaw nagpabaskog gid sang akon panaksihon. Nagapasalamat gid ako sa akon titser sa Sunday School kag sang tanan niya nga ginahimo para sa amon klase tagsa ka semana.



# Visiting Teaching— isa ka Sagrado nga Takay

Tun-i ining materyal sing mainampuon kag, kon nagakabagay, hambali ini upod sang mga sisters nga inyo ginabisita. Gamita ang mga pamangkot agud buligan kamo sa pagpabakod sang inyo mga sisters kag himuong ang Relief Society nga aktibo nga bahin sang inyo mismo kabuhi.

**Pagtuo, Pamilya, Bulig**

**B**ilang mga visiting teachers, may yara kita sang importante nga pang-espirituhanon nga misyon nga dapat tumanon. “Ang bishop, nga amo ang gintangdo nga manugpahalab sang ward, indi sarang makabantay sang tanan nga mga karnero sang Ginuo sing dulungan. Nagasalig sia sa inspirado nga mga visiting teachers nga magbulig sa iya.”<sup>1</sup> Importante ang pagpangayo kag pagbaton sang bugna sa kon sin-o ang dapat takayan sa pagbantay sang tagsa ka sister.

Ang inspirasyon nagsugod samtang ang mga miyembro sang panguluhan sang Relief Society mapinangamuyuon nga nagahnambalanay parte sa mga panginahanglan sang mga indibidal kag mga pamilya. Kag dayon, nga upod ang pahanugot sang bishop, ang panguluhan sang Relief Society nagahatag sang takay sa paagi nga nagabulig sa mga sisters sa paghangop nga ang visiting teaching isa ka importante nga espirituhanon nga responsibilidad.<sup>2</sup>

Ang mga visiting teachers sinsero nga nagkilala kag napalangga sang tagsa ka sister, nagabulig sa iya sa pagpabaskog

sang iya pagtuo, kag nagahatag sang serbisyo kon kinahanglanon. Nagapangayo sila sang inspirasyon nga mahibaloan kon paano sabton ang espiritwal kag temporal nga mga panginahanglan sang tagsa ka sister nga ila ginabisita.<sup>3</sup>

“Ang visiting teaching mangin buluhaton sang Ginuo kon ang aton ginatutokan amo ang mga tawo imbes ang mga numero. Sa matuod-tuod, ang visiting teaching wala'y katapusan. Ginkabig ini nga pagginawi sangsa buluhaton.”<sup>4</sup>

## Gikan sa Balaan nga mga Kasulatan

Mateo 22:36–40; Juan 13:34–35;  
Alma 37:6–7

## Gikan sa Aton Kasaysayan

Si Eliza R. Snow, ang ika-duha nga pang-kabilugan nga pangulo sang Relief Society nagtudlo, “Ginakabig ko ang palangkuan sang isa ka titser nga isa ka mataas kag sagrado nga palangkuan.” Iya ginlaygayan ang mga visiting teacher “nga mangin puno sang Espiritu sang Dios, sang kaalam, sang pagpaubos, sang paghigugma” antes sila magbisita sa mga

puluy-an agud ila mahibaloan kag masabat ang espiritwal nga mga panginahanglan subong man ang temporal. Sia nagsiling, “Mahimo nga imo mabatyagan ang maghambal sang mga pulong sang paghidaet kag pagpaumpaw, kag kon imo matukiban ang isa ka sister nga ginatugnawan, dapita sia sa imo tagipusuon kasubong nga imo ginahakos ang isa ka bata sa imo dughan agud mainit-initan [sia].”<sup>5</sup>

Kon magpadayon kita sa pagtuo kasubong sang ginhimo sang nauna nga mga sisters sa Relief Society, mangin yara sa aton ang Balaan nga Espiritu kag mangin inspirado sa paghibalo kon paano makabulig sa tagsa ka sister nga aton ginabisita. “Pangitaon [naton] ang kaalam imbes ang gahum,” siling ni Sister Snow, “kag [aton] maangkon ang tanan nga gahum nga may kaalam [kita] sa paggamit”<sup>6</sup>

## MGA TANDA

- Julie B. Beck, “Relief Society: A Sacred Work,” *Liahona*, Nob. 2009, 114.
- Tan-awa sa *Handbook 2: Administering the Church* (2010), 9.5; 9.5.2.
- Tan-awa sa *Handbook 2*, 9.5.1.
- Julie B. Beck, *Liahona*, Nob. 2009, 114.
- Eliza R. Snow, sa *Daughters in My Kingdom: The History and Work of Relief Society* (2011), 108.
- Eliza R. Snow, sa *Daughters in My Kingdom*, 45–46.

### ***Ano ang Sarang Ko Mahimo?***

**1.** Paano ako mag-uswag sa akon abilidad agud matuman ang akon importante nga responsibilidad bilang isa ka visiting teacher?

**2.** Bilang isa ka visiting teacher, paano ako makabulig sa iban nga mga sisters nga matuman ang ila responsibilidad bilang mga visiting teachers?

Para sa dugang nga impormasyon,  
mag-log on sa [reliefsociety.lds.org](http://reliefsociety.lds.org).